



8. ՂԱՄԲԱՐ

Կըլնի չիլնի մի կնիկ: Էս կնիկը մի մինուճար տղա ա ունենում՝ անումը ըլնում ա Ղամբար: Սրանք շատ դառն-աղքատ, անճար են ըլնում: Տղեն աստու իրան օրը պարանը վեր էր ունում, էթում հանդը, փուշ թոփ անում, թիթեն-միթեն կիտում, բերում բազար՝ ծախում, մի քանի շալի աշխատում տալիս ին հացի, ուտում, դլուխ պահում:

Օրեն մի օրը էդ Ղամբարը կիտած փուշը-մուշը բերում ա բազար՝ թագավորի ամարաթի աղաքը, մեյդանումը ծախում ա:

Թագավորի աղջիկը, որ Ղամբարի քըրչ ու փալասը, քրքըրված շորերը տննում ա, էթում ա հորն ասում.— Խն՝ղճ տղա, որ կնիկ ունենար հո՛ր ըսենց քըչոտ ճղճղված չէր ման գա:

Թագավորը էս որ լսում ա, էլ ձեն ծպտոն չի հանում. կանչում ա իրա նազիր-վեզիրին.— Գնացե՛ք,— ասում ա,— էն փուշ ծախող տղին կա՛նչեք գա:

Նազիր-վեզիրն էթում են Ղամբարին կանչում:

Ղամբարը էս որ լսում ա, շատ ա վախենում, մնում ա մոլորած, թե յարաբ թագավորն ինձ խի՞ պտի կանչի:

Վեր ա կենում գալի թագավորի ամարաթը, թագավորին գլուխ տալի, ընդե կաննում:

— Տղա՛,— ասում ա թագավորը,— քեզ կանչել եմ, որ իմ աղջիկը տամ քեզ, կա՞ռնես:

Ղամբարը մնում ա շշմած, թե թագավորը էս ի՞նչ ա ասում։ Թագավորի աղջիկը էս որ տենում ա, մեջ ա ընկնում։

— Ա՛յ տղա,— ասում ա,— խի՞ մոլորեցիր. հերնումերս ո՛ր տալիս են, դու խի՞ ես վախենում, դե ա՛րի ինձ ո՛ւղա էլի։

Թագավորը բերում ա աղջկանը տալի Ղամբարին, պսակում, օխտն օր, օխտը զշեր հարսանիք անում։ Ղամբարը թագավորի աղջիկը վեր ա ունում, տանում իրանց տունը։

Որ հասնում են տուն, Ղամբարը մորն ասում ա.— Նա՛նի թագավորը կանչեց, աղջիկը տվեց ինձ. հրեա ըս էլ քու հարսը. բե՛մի զադ քցա թագավորի աղջիկը նստի։

Ղամբարենց տունը շատ քոսոտ, քնձրոտ տուն ա ըլնում. պատերը կեղտոտ-մեղտոտ, աթարի մխիցը սևացած, միշին էլ, որ ասես, կարպետի թրիշա շիլնում, հենց թաք էրկու իծի փոստ ա ըլնում, ըն էլ քրթրված, շունքի մերը էդ փոստերիցը Ղամբարի շորերի հմար կարկտաններ էր պոկում։ Մերը մի քրթրված փոստ բերում ա քցում թագավորի աղջկա տակը։

Թագավորի աղջիկը նստում ա, տենում ա տան հալը ի՛նչ ա, աստուն փառք ա տալի. «Հալքա՛թ,— ասում ա,— իմ՛ ճակատին էլ էս էր գրած»։ Սննա բերում ա իրա շորերիցը Ղամբարի հմար կարկտաններ ա կտրատում, նրա շորերը կարկտում, սրբում, թամ-զացնում, շնորքի բերում։ Էգսի օրը Ղամբարը էլի վեր ա կենում, էթում հանդը փուշ-մուշ կիտում, թիթեն հավաքում, տանում թագավորի ամառաթի աղաքի մեյդանումը ծախում։ Թագավորը ակուշկիցը տենում ա՝ դրուստ որ ըսօր Ղամբարի շորերը ամեն վախտվա պես ճըղճըղոտված չի։

Իրիկունը Ղամբարը որ տուն ա գալի, կնիկը տենում ա սաղ ձեռները փուշ քաղելուց քրթրված, ծակծկված ա, սիրտը մղկտում ա։

— Ա՛յ մարդ,— ասում ա,— ըս էլ մի ապրուստ չի, սաղ օրը ըսենց քրթրվում ես, քարի հեննա քաղվում, ալաղի հեննա մաղվում, աշխատում ես, աշխատում, օձի, գորտի հեննա ջուր խմում, դառը դատում, մաղբուն նստում. աշխատածդ էլ էրկու-իրեք շալի ա. հազիր գնա՛ մի ուրիշ գործ գտի, նոքարությո՛ւն արա, ֆահլու-թյո՛ւն արա, որ մեր աշքն էլ զադ տենա։

— Լա՛վ, ա՛յ կնիկ,— ասում ա Ղամբարը,— որ ասում ես՝ ըտենց կանեմ։

Առավոտը էն բաշտեն Ղամբարը վեր ա կենում, էթում բա-

զարի դուռը, բալքի ֆահլա բռնվի, յա ամսով մնի կուշտը նոքար ըլնի, աշխատանք անի: Դե՛ս ա էթում, դե՛ն ա էթում, սրա՛ն հարցնում, նրա՛ն հարցնում, վերջը տենում ա հրես մի բեզրգյան ընկել ա, նոքարի ա ման գալի:

էս բեզրգյանը գալիս ա Ղամբարի կուշտը, հարցնում.— Տղա՛, նոքար չե՞ս ըլնի:

— Խի՛ չեմ ըլնի,— ասում ա Ղամբարը,— ես էլ զաթի տեղի ի ման գալի: Եննա, տարեկան հախս ի՞նչ կտաս,— հարցնում ա Ղամբարը:

— Հալալիցը՝ մի աղչա, հարամիցը՝ էրկու աղչա,— ասում ա բեզրգյանը:

— Բա՛ս որ ըտենց ա, էթամ կնկանս հարցնեմ, գամ,— ասում ա Ղամբարը:

էթում ա տուն, կնկանն ասում.— Մի բեզրգյան ուզում ա ինձ նոքար բռնի. ասում ա՝ հալալիցը մի աղչա կտամ, հարամիցը՝ էրկու, հմի չեմ գիտա ո՞րը վեր ունեմ:

— Հարամիցը որ տասը աղչա էլ տա՝ վե չունես, հալալիցը մի աղչա էլ տա՝ վե՛ կալ,— ասում ա կնիկը:

— Բաս որ ըտենց ա, կէթամ բեզրգյանին նոքար, նա էլ զաթի պտի էթա ուրիշ երկիր ապրանքի:

Կնկա հեննա մնաս բարով ա անում, վե կենում էթում բեզրգյանի կուշտը:

— Բեզրգյա՛նը սաղ ըլնի,— ասում ա Ղամբարը,— հալալից որ մի աղչա տաս, քու կուշտը նոքար կմննեմ:

— Լա՛վ, ասում ա բեզրգյանը,— կտամ, խի՛ չեմ տա:

էս Ղամբարն ա՝ ճամփի թաղարեք ա տենում, քոչ ու բարխանա ա անում, բռնեքը բարձոտում, կապում, կապկապում, բեզրգյանի հեննա ընկնում ճամփա: էթում են, էթում են, շատն ու քիչն աստոծ գիտա, մի օր, էրկու օր, իրեք օր, մախլասի՝ մի շաբաթ, հասնում են մի շուլ-յաբանի տեղ:

Ըստե բեզրգյանը Ղամբարին ասում ա.— Արի՛ բռնեքը վե դնենք էս ջրֆորի կշտին, համ դավլաղաթիբը ջրենք, համ էլ մի քիչ հաց-մաց ուտենք, դինջանանք, նոր վե կենանք, ընկնենք ճամփա:

Բռնեքը ըստե վեր են դնում, հացի թաղարեք են տենում, որ ուտեն: Հաց են ուտում, պրծնում, եննա բեզրգյանը Ղամբարին

հարցնում ա.— Կա՞րաս մենի էս ֆորը, փարխաշով ջուր հանես, որ դավլադաթիրը ջրենք:

— Կարամ, խի՞ չեմ կարա,— ասում ա Ղամբարը:

Բերում են պարանը կապում Ղամբարի միջքիցը, կախ տալի ֆորը: Ղամբարը կախ ա ընձում ֆորը, փարխաշը լցնում ա՝ քաշում են, լցնում ա՝ քաշում են, լցնում ա՝ քաշում են, ընշանք սաղ դավլադաթիրը ջրում են պրծնում:

Նննա Ղամբարը ձեն ա տալի.— Բեղրդյա՛նը սաղ ընի, դե՛ հմի պարանը կա՛խ տվեք դուս գամ:

Պարանը կախ են տալի ֆորը. Ղամբարը հենց էն ա ուզում էր կապի մեջքը, մըն էլ ի՛նչ տենա՝ փեշիցը քաշում են, չեն թողում դուս դա: Ղամբարը մնում ա մոլորած, թե էս ի՛նչ բաս ա. եդ ա մտիկ տալի, տենում ա հրես էրկու դուռ ա բաց էլե ֆորի միջին: Մի դռնովը մտիկ ա տալի, տենում լիքը իսանի ջամդաք ա, մեկել դռնովն ա մտիկ տենում՝ գլուխ ա. մխելի դպա նեքսե ա մտիկ տալի, տենում ա հրես իրեք սիրո՛ւն, նաշխո՛ւն, հուրի-մալաք աղջիկ նստած քարզահ են անում. էն դիհն էլ մի էրծաթե սինու վրեն մի շեշտ Գորտ ա դրած, մի սիրո՛ւն, նաշխո՛ւն տղա էլ հենց հայիլ-մայիլ էլած էդ Գորտին ա մտիկ տալի:

— Տղա՛, — հարցնում են էդ աղջկեքը, — ա՛րի դրուստն ասա, մենք ենք սիրուն, թե էդ շեշտ Գորտը, որ էդ տղեն հայիլ-մայիլ էլած դրան ա մտիկ տալի:

— Ի՛նչ ասեմ,— ասում ա Ղամբարը, — սրտի սիրածը սիրուն կըլնի:

էս ասելու բաշտան Գորտը շաթմիշ կըլնի, կպատուլի, միջիցը մի դհա՛ սիրուն, դհա՛ նաշխուն աղջիկ դուս կգա, էն դիհը կկաննի:

— Է՛ս ինչ բաս ա, էսքամ իսանի ջամդաքն ու գլուխը ո՞րդիան ա, — հարցնում ա Ղամբարը տղին:

— Տղա՛, — ասում ա, — թամամ քառասուն տարի ա էս ֆորի միջին եմ, ինչքամ մարդիկ են կախ էլե էս ֆորը, քեզանից սավայի մինն էլա չէր ասե, թե. «Սրտի սիրածը սիրուն կըլնի», քոմմքի գլուխն էլ կտրել ենք, ըստե վե քցե: — Նննա աղջկերանցն ասում ա.— Դե՛, սրա խալաթը բերեք, որ ըսենց խելոք ջուղաք տվեց:

Աղջկեքը կէթան իրեք նուռ կբերեն, կտան Ղամբարին: Տալու բաշտան էդ էրկու դուռն էլ եդ կըլնի, կշինվի: Ղամբարը ափալ-

Թափալ նռնեիր կոնի ջերը, ձեն կտա.— Բեղրգյա՛նը սաղ ըլնի, դե՛ քա՛շեք:

Բեղրգյանը Ղամբարի ձենը որ կըլսի, շատ կուրախանա, աստուն փառք կտա, որ նոքարը սաղ-սալամաթ էդ ֆորիցը պրծալ, շունքի թամամ քառասուն նոքար էր բռնե, քառասունն էլ մին-մին որ մտել ին էդ ֆորը ջուր հանելու, էլ եդ դուս շին էկե, քոմմա կորել ին էդ ֆորի միջին: Պարանը կքաշեն, Ղամբարին կհանեն: Ղամբարը որ ֆորիցը դուս կգա, ըսկի բեղրգյանին բան չի ասի, թե ի՛նչ էր տեհե, յա ի՛նչ էր լսե ֆորումը: Բերում են բռնեիրը կապոտում են, բարձում, ընկնում ճամփա: Էթում են, էթում են, մխելի տեղ էթում են, սրանց մի ուրիշ քարվան ա ռաստ գալի, որ էթում էր դպա Ղամբարենց երկիրը: Ղամբարը աշքը ման ա ածում, տենում ա իրանց գեղցի մի տղա էդ քարվանի միջին ա:

— Էդ ո՛ւր եք էթում,— հարցնում ա Ղամբարը էդ տղին:

— Էթում ենք մեր գեղը,— ասում ա էդ տղեն:

— Դե՛ որ էթում ես,— ասում ա Ղամբարը,— ի՛նչ կըլնի էս իրեք նուր տանեա մեր տունը, կնկանս տաս:

— Դրա մալիաթն ի՛նչ ա, որ շտանեմ. տո՛ւ, տանեմ,— ասում ա էն տղեն:

Նռնեիր Ղամբարի ձեռիցն առնում ա, դնում ծոցը, Ղամբարի հենեա մնաս բարով ա անում, էթում իրա ճամփեն: Սրանց քարավանը դեսն ա էթում, Ղամբարենց քարվանը՝ դենը:

Թող սրանք էթան, դանք խարար տանք Ղամբարի կնկանիցը: Էդ վախտերը Ղամբարի կնկա ոտը ծանդր էր, սիրտը նուռ էր ուզում, համա ձեռը չէր ընկնում: Օրեն մի օրը դրանց քուլի դուռը կծեծեն. Ղամբարի կնիկը կգա կտենա իրանց հարևանի տղեն:

— Բա՛րով, ա՛յ քիւր,— կասի էս տղեն,— ա՛ո էս նռնեիրը, Ղամբարը ճամփին ռաստ էկալ, տվեց, որ քեզ հասցենեմ: Ինքն էլ սաղ-սալամաթ ա, քեզ շատ բարե ա անում:

Ղամբարի կնիկը տղի ձեռիցը նռներն առալ, մտալ նեքսե.— Յավաշ,— ասեց,— մի նուր կտրիմ, համը տենամ:— Կտրեց ի՛նչ տենա՝ ա՛կնունք ասես, բոլիա՛նդ ասես, ա՛լմաստ ասես, մի խոսքով՝ աշխարհումը ինչքան թանկագին քարեր կային՝ քոմմիցը մեջը լիքն էր: Սրանք որ տեհալ՝ ուրախացալ, աշխարով մին էլալ, ուրախությունիցը չէր իմանում ի՛նչ անի: Զաթի ձեռն էլ պակաս էր. էն

սհաթը մի քար ղրկեց բազար սարաֆի կուշտը, ծախիլ տվեց, էն փողովը տան հմար ղադ-մադ առավ: Կամանց-կամանց էն մեկեկ քարերն էլ ղրկեց բազար ծախոտեց, թաղա տներ շինիլ տվեց, լավ տան մեջ, սարք ու կարգ առավ, կովեր, ոչխարներ առավ, մախլասի՝ զլուխներդ ի՛նչ ցավացնեմ, ամեն բան առավ, հազրեց ընչանք Ղամբարի եդ գալը: Հա՛, ինքն էլ պառկեց մի սիրուն, նաշխուն, դմբռնիկ տղա բերեց:

Սրան թողանք ըստե, գանք խաբար տանք Ղամբարիցը:

Բեզրգյանի քարվանը գալիս ա, գալի, հասնում ա իրա երկիրը: Տասնըօխտը կոլոլիկ տարի Ղամբարը էդ բեզրգյանի կշտին նոքարություն ա անում:

Օրեն մի օրը էլի բեզրգյանը Ղամբարին ասում ա.— Ղա՛մբար, ճամփի թաղարեք տե՛ս, որ էլի պտի էթանք ուրիշ երկիր ապրանքի:

Ղամբարը էս որ իմանում ա, ուրախանում, աշխարով մին ա ըլնում, շունքի պտի իրանց երկրովը անցկենային. միտք էր անում, ոնց որ ըլնի կէթա իրա տունուտեղը, օղլուշաղը կտենա: Ղամբարը ճամփի թաղարեք ա տենում, քոչ ու բարխանա են անում, բռնեբը բարձոտում, ընկնում ճամփա: Գալիս են, գալիս են, գալիս են, շատն ու քիչն աստոծ գիտա, մի օր, էրկու օր, իրեք օր, մախլասի՝ մի շարաթ, գշեր-ցերեկ գալիս են, հասնում են էն ջրֆորի կուշտը, որ Ղամբարը մտավ, ջուր հանեց: էլի Ղամբարը մննում ա ֆորը, ջուր ա հանում, ղավլաղաթիբը ջրւմ են, համա էն աղջկեքը չեն էրևում. ո՛նչ դուռ ա բացվում, ո՛նչ զադ: Ըստե մի քիչ դինջանում են, հաց-մաց ուտում, պրծնում, էլի վե կենում էթում իրանց ճամփեն: էթում են, էթում են, մի օր, էրկու օր, իրեք օր, մախլասի՝ մի շարաթ, հասնում են Ղամբարենց երկրի սնուռը: Ըստե բռնեբը վեր են բերում, որ մի քիչ դինջանան, հաց ուտեն, էլի վե կենան էթան: Որ վեր են գալի, տենում են հրես մի եքա ոչխարի սուրու ա արածում: Ղամբարը մոտանում ա էդ սուրուին.

— Բա՛րո՛վ, շորան աղպեր,— ասում ա:

— Ա՛սուռ բարին, ճամփորդ աղպեր,— ասում ա շորանը:

— Դու ֆլա՞ն գեղիցն ես,— հարցնում ա Ղամբարը:

— Հա՛,— ասում ա շորանը:

— էն Ղամբարին կճանա՞նչես, որ գնացել ա դարբություն,

յարար ի՞նչ խաբար ունեւ նրա տանիցը.— հարցնում ա Ղամբարը:
— Ո՞նց չեմ ճանանչի, հենց էս սուրուն էլ նրանն ա, ես էլ
նրա շորանն եմ,— ասում ա:

— Ի՞նչ Ղամբար,— դարմացած հարցնում ա:

— Էն փուշ ծախող Ղամբարը, որ հլա թագաւորն էլ ինդդ
արեց, իրա աղջիկը տվեց նրան,— ասում ա շորանը:

Ղամբարը ըստե մնում ա միտք անելուն, թե էս ի՞նչ բաս ա,
էս հարուստ Ղամբարը ո՞վ ա, որ էս շորանը ասում ա: Էդ շորանին
թողում ա, վե կենում գալի իրանց քարվանի կուշտը: Հաց են
ուտում պրծնում, թագադան բեռները բարձում են, ընկնում ճամ-
փա դպա Ղամբարենց գեղը: Ծամփին դհա-դհա ուրիշ սուրու, նա-
խիր, իլխի ա ռաստ գալի. ինչքամ շորան ա տենում, Ղամբարը
հենց ո՞ւմ հարցնում ա, թե. «էս ո՞ւմն ա», քոմմա ասում են. «Ղամ-
բարինն ա»: Է՛հ, էս Ղամբարն ա՝ մնում ա շիվարած, թե յարար
էս ի՞նչ բաս ա, իրա կնիկը ո՞նց ա ըսենց հարստացե. էնքամ
մալ ու դովլաթի տեր դառեւ: Վերջը գլխներդ ինչ ցավացնեմ, ըսենց
միտք անելուն, միտք անելուն Ղամբարը ճամփա էր գալի:

Գալիս են գալի, հասնում են Ղամբարենց գեղը:

Հասնելու բաշտան Ղամբարը իղին ա ուղում բեզրգյանիցը, որ
էթա իրանց տունը:

Բեզրգյանը ասում ա.— Էթում ես, գնա՛:

Մեր Ղամբարն ա՝ ուրախ-ուրախ վեր ա կենում գալի: Գալիս
ա, մննում ա իրանց քուչեն, հա՛ վիրև-նեքեւ ա անում, իրանց տու-
նը շի գտնում. ըսենց հինգ-վեց հետ էթում ա գալի իրանց քուշովը,
էլի շի գտնում, շունքի իրանց տան տեղը մի ընե՛նց տներ ին կան-
նացրե, մի ընե՛նց տներ ին կաննացրե, որ տենողի խելք էր էթում:
«Ա՛րի,— ասում ա,— մի մննեմ էս տունը, հարցնեմ, բալքի մի խա-
բար եմ իմանում իմ կնկանիցը»: Ըսենց դառը-տխուր էդ հայաթն ա
մննում: Մննելու բաշտան աչքը քցում ա օթախի ակուշկին, ի՞նչ
տենա՛ հրե՛ս իրա կնիկը նստած ա, մի ջահել, սիրուն, նաշխուն,
շենքով-շնորքով տղա էլ կողքին, իրար հեննա զրից են անում:
Ուսուլով մոտ ա էթում ակուշկին, որ էդ տղի ու կնկա զրիցը լավ
լսի:

Կնիկը էդ տղին ասում ա.— Ա՛խ, բա՛ւա ջան, աչքե՛րիդ դուր-
բան, ջա՛նիդ դուրբան հերդ որ գա տենա հասած տղա ես դառե՛
ի՞նչքամ կուրախանա, աշխարով մին կըլնի:

— Է՛հ, աղի ջան,— կասի տղեն,— աչքս բաց եմ արեմ, հենց քեզանից էդ եմ լսում. բա ե՞րբ պտի գա, ախար աչքնեքս ջուր կըտրեց նրա ճամփին պահելուն:

— Ա՛յ որդի, աստոծ ողորմած ա, մըն էլ տեհար՝ էկավ, ջանը սաղ ըլնի, եր գալիս ա, թող գա:

Էդ խոսքի վրեն Ղամբարը էլ չի կարում իրան պահի, էլ չի համբերում, մենում ա նեքսե: Միղաֆիլ որ նեքսե ա մենում, մեր ու տղա սառում են, իրար էրեսի մտիկ տալի:

— Բա՛ ինձ չե՞ք ճանանշում,— հարցնում ա Ղամբարը,— ախր ես Ղամբարն եմ:

Որ էս չի ասում, մեր ու տղա վրա են պրծնում, փաթթվում նրա ճտովը: Կնկա վրեն հո՛ էլ հալ չմնաց, էնքա՛մ ուրախությունիցը լաց էլավ: Նոր նստում են ըստեմ ասում, խոսում, մասլահաթ անում, ջան ասում, ջան լսում: Եննա կնիկը բերում ա հաց ա քցում, ուտում են, խմում, կշտանում, ասսուն փառք տալի:

— Ա՛յ կնիկ,— հարցնում ա Ղամբարը,— էսքամ մալ ու դուլվաթը ո՞րդիան ա, որ ըսենց լավ տներ ես շինեմ, սուրճի, նախրի, իլսու տեր ես դառն:

— Բա՛ չե՛ս ասի,— ասում ա,— ըսե՛նց, ըսե՛նց, ըսեն՛ց բան: Էն իրեք նուռը, որ դու դրկել իր, մի հատ բերի ճղեցի, ի՛նչ տենամ՝ մեջը լիքը ակն ու մարգարիտ, բուխանդ ու հաղար ու մի տեսակ թանկագին քարեր: Դրկեցի բաղար սարաֆի կուշտը, ծախեցի, էն փողովը մեր տուն ու տեղը սարքեցի:

Էթում ա Ղամբարի դրկած նռներից մինը բերում ա տալի Ղամբարին: Ղամբարը նուռը վեր ա ունում, ճղում, ի՛նչ տենա, դրուստ որ մեջը լիքը սաղ ակն ու մարգարիտ, անգին քարեր. ուրախանում, աշխարով մին ա ըլնում: Նոր նստում ա ըստեմ իրա գըլխով՝ անցկացածը մին-մին նաղլ ա անում կնկանը, ո՛նց որ ես ձեզ նաղլ արի:

— Բա՛ս որ ըսենց ա, ա՛յ կնիկ, սրանից դենը էլ խի՞ եմ նոքարություն անում. էթամ բեզդոգյանին իմաց տամ, թող իրա համար նոքար գտնի:

— Ծա՛տ լավ կանես,— ասում ա կնիկը,— բոլ ա ինչքամ նեղ օրի դիմացանք. բոլ ա ինչքամ գշեր-ցերեկ մալուլ-մուշկուլ անց կացրի, սե օրեր տեհա. մի քիչ էլ մեղ հմար ապրենք, օր տենանք, դովրան քաշենք, քանի սաղ ու կենդանի ենք գլխներս դինջ ապրենք:

Ղամբարը վեր ա կենում, էթում բեղրգյանի կուշտը:

— Բեղրգյա՛նը սաղ ըլնի,— ասում ա,— ինձ մուրախաս արա էթամ իմ բանին, բոլ ա ինչքամ նոքարություն արի:

— Դու գիտաս,— ասում ա բեղրգյանը,— էսքամ տարի կշտիս նոքարություն ես արեմ, քեզանից զանգատավոր չեմ, համա հմի որ էլ չես ուզում կենա, ըն էլ դու գիտաս. զնա՛, աստոժ քեզ հետ:

Բեղրգյանը բերում ա ինչ որ նրա հախն էր տալիս ա, ճամփու գնում: Ղամբարը բեղրգյանի հեննա մնաս բարով ա անում, վեր ա կենում ուրախ-ուրախ գալի տուն:

Որ տուն ա գալի թե չէ, կնկանը հարցնում ա.— Ղորթ իմ զնալուց եղբ թագավորը ըսկի քեզ հարցրեի ա՛ ի՞նչ ես անում, ո՞նց ես ապրում, սա՞ղ ես, մեռած ես:

— Չէ՛,— ասում ա կնիկը,— որ ասես, չի հարցրեմ. էրևում ա թունդ ա ինադ արեմ: Համա ես միտք եմ արեմ,— ասում ա,— որ դու սաղ-սալամաթ գաս, մի օր հորս կանչենք իրա նաղիր-վեղրի հեննա մեզ ղոնաղ. ո՛վ գիտա, նա ընենց ա իմանում՝ մենք սովածությունից մեռել ենք, պրծեմ:

— Ա՛յ կնիկ,— ասում ա Ղամբարը,— էդ լավ ես միտք արեմ, բաս որ ըտենց ա, թագարեք տե՛ս, հենց էգուց. թագավորին կանչենք ղոնաղ:

— Կանչե՛նք,— ասում ա կնիկը,— ո՛վ գիտա, մեզ որ տենա, ըսկի չի էլ ճանանչի:

Է՛հ, Ղամբարի կնիկն ա՛ փա՛ռք աստու, տունուտեղը լիքը, դուռը լիքը, վեր ա կենում թագարեք տենում, մի լավ ղոնաղլը սարքում:

Էգսի օրը Ղամբարն էթում ա թագավորին կանչում ղոնաղ: Թագավորը վեր ա կենում իրա նաղիր-վեղրի հեննա գալիս ա սրանց տունը: Թագավորին լավ պատիվ են տալի. ուտում են, խմում, քեֆ անում:

Հենց էն թունդ քեֆի վախտը Ղամբարի կնիկը թագավորին հարցնում ա.— Թագա՛վորը սաղ ըլնի, դու մի աղջիկ ունեիր, ի՞նչ էլավ:

— Ի՞նչ ասեմ,— ասում ա թագավորը,— մի փուշ ծախող կար. աղջիկս աչքը քցեց նրան, ես էլ ինադ արի, վե կալա տվի, համա, հմի որ միտա ա ընկնում, լերդ ու ջիգյարս էրվում ա, փոթոթվում մնում: Արեւ եմ ձեռներովս, լաց եմ ըլնում աչքերովս,— ասում ա

Թագավորը:— Հմի շատ եմ փոշմանի, շատ եմ գլխիս վա՛յ տալի, ձեռս դադ չի ընկնում. տենաս սա՞ղ ա, Թե սովածությունից մեռել ա: Ա՛խ, նրան մի տենայի, էլ դարդ չէի ունենա:

Էդ խոսքի վրեն Ղամբարի կնիկը էլ չի կարում համբերի. վրա ա պրծնում, փաթթվում հոր ճտովը:

— Ես քու աղջիկն եմ,— ասում ա,— բա չե՞ս ճանանչում, ըս էլ իմ տղեն ա, ըս էլ դաթի իմ փուշ ծախող մարդն ա. բաս որ ասում ի՛նչ էս փուշ ծախողի միջին մի հունար կա, դու չի՞ր ավատում: Հմի տե՛նում ես իրա հալալ քրտնքովը ինչքամ մալ ու դու՛ վաթ ա կիտե:

Թագավորը մնացել էր սառած նրանց էրեսին մտիկ անելոն, իրա աչքերին չէր ուզում ավատա, հենց իմանում էր՝ էրազում ա:

Նոր Թագադան ի՛նչ քեֆ, ի՛նչ ուրախություն, ի՛նչ դափ ու զուռնա, որ էլ հալ ու հասար չկար:

Նրանք հասան իրանց մուրադին, դուք էլ հասնեք ձեր մուրադին:



